

漢書疏證

漢書疏證卷三十三

吳 沈欽韓撰

谷永杜鄴傳

詔舉方正

按杜欽傳云舉賢良方正帝紀亦有賢良字

閻妻驕扇

詩正義中候璽雜貳曰昌受符厲倡嬖期十之世權在
相又曰剡配姬以放賢山崩水潰納小人家伯罔主異
載震按閻剡古今字異

楚莊忍絕丹姬

呂覽

直諫

說苑

正諫

並云丹之姬是荆文王事正諫篇又云

莊王立鼓鐘之間左伏陽姬右擁越姬未知谷永所用何等師古以爲集作夏姬非也漢人引典故豈如村夫子耳目所限哉

六罰既侵

五行傳作六伐伐罰義同

未殺

淮南俶眞訓獨浮游無方之外不與物相弊擲注弊擲猶雜糅弊音跋涉之跋擲讀楚人言殺釋名摩娑猶末殺也手上下之言也與弊擲音義同

滿闌

滿毋官切義同謾列子說符宋有蘭子者張湛云史記無符傳出入爲闌應劭曰闌矣也此所謂蘭子者以技矣遊者也疑蘭與闌同凡人物不知生出主謂之蘭也說文闌詆闌也義從闌生此當爲闌

磐互

何焯曰互古字作𠄎與牙不同顏後解乖于小學按廣韻互俗作𠄎非古字

白過

韓詩外傳士欲行義白名說苑立節作著名此白過亦

卽著過也

白氣起東方

易通卦驗兌西方也主秋分日白氣出直兌此正氣氣出右萬物不生氣出左則虎害人

黃濁冒京師

五行傳時則有黃眚黃祥惟金木水火沴土鄭云四行來沴土地乃動臣下相帥此卽五侯並封黃霧四塞之事隋五行志京房易飛侯曰聞善不及茲謂有知厥異黃厥咎龍厥災不嗣蔽賢絕道之咎也

山石之異

易是類謀離氣不效赤帝世女訛誣虹蜺數興石飛山崩隋五行志洪範傳曰石自高隕者君將有危殆也

永奏書謝鳳

著此者賤其拜爵公朝謝恩私室也

擢之皁衣之吏

永爲太常丞掌祭祀小事續志祀宗廟諸祀冠長冠服衿玄張敞云備皁衣二十餘年亦謂倚祠服之非朝衣也

齊客隕首所以報恩施

此當爲北郭騷自刎以白晏子事見晏子雜篇及呂覽

士節說苑復恩篇按師古所引則見史記孟嘗君傳一事而傳異也

尙在桑榆之間

天官書太白出而留桑榆間疾其下國

晉灼曰行上而遲而下也

疾未盡其日過參天疾其對國

護苑使者

典護牧苑在西北邊郡者唐六典上牧監職注云漢舊儀太僕牧師諸苑三十六所分布北邊西邊以郎爲苑監中興省漢陽有牧馬苑令羽林郎監領魏置牧官都尉晉因之北齊太僕寺統左右牧馳牛司羊等置令丞

後周有典牧典牝上士一人中士一人皇朝分爲牧監諸羣牧別立南使北使西使東使以分統之按護苑使者卽羣牧使之職也宋史職官志景德四年置羣牧司制置使一人以樞密使副爲之咸平三年以兩省以上官充則其職加崇矣明設苑馬寺卿

黑龍同姓之象也

李光地曰俱爲異姓游說漢以火德王如何更以黑龍爲同姓按漢以火王水滅火異姓爲陰類此則王氏傾國之兆

九年九月黑龍見

成紀永始二年詔曰邇者龍見于東萊與此同在元年荀記編于二年冬彼誤也

今年二月己未

帝紀荀紀並作癸未與乙酉相距二日此誤

炮格

呂覽過理篇紂爲格雕柱而桔諸侯不適也

注格以銅爲之布火

其下以人置上人燭墜火而死以爲笑樂

御覽八十

桓子新論曰紂無道燭

金爲格諸書皆訛爲炮烙

至爲人起責

唐置捉錢令史爲官生息似之

詳食貨

烏集雜會

管子形勢解與人交多詐僞無情實偷取一切謂之烏集之交

飲醉吏民之家

說苑正諫篇吳王欲從民飲酒伍子胥諫曰白龍不化豫且不射今弃萬乘之位而從布衣之士飲酒臣恐其有豫且之患矣

流酒

文選注

三十

薛君韓詩章句曰齊顏色均眾寡謂之流

閉門不出客謂之酒

役百乾谿

繁露王道篇楚靈王內罷其眾乾谿有物女水女同盡

則見女水滿則不見靈王舉發其國而役三年不罷楚

國大怨

惡洽變備

一切經音義六蒼頡洽徧徹也

遁无妄之卦運

易稽覽圖无妄九月天下無雲而雷三十日之外雷行
夜從西南正東北位此應劭所據也按京房六日七分
圖无妄爲九月卦九月雷已收聲無雲而雷故爲大災

隋五行志無雲而雷京房易飛候曰國將
易君下人不靜小人先命國凶有甲兵

後人亦謂非

意之禍爲无妄論衡明雩篇災變大抵有二有政治之
災有無妄之災德豐政得災猶至者無妄也德衰政失
變應來者政治也宋書禮志散騎常侍戴邈上表曰自
頃遭無妄之禍社稷有綴旒之危其直以爲卦應者論
衡寒溫篇按易無妄之應水旱之至自有期節劉淵林
吳都賦注易無妄曰災氣有九陽厄陰厄則律歷志所
謂陽九也虞氏易曰京氏及俗儒以无妄爲大旱之卦
萬物皆死無所復望也失之遠矣有无妄然後可畜不
死明矣是漢以前師說並以无妄卦爲惡運至虞乃始

據經文正之師古但云以无妄卦爲義其亦至庸陋矣
醉酒狂悖卒起之敗

韓非八經脫易不自神曰彈威其患賊夫酖毒之亂起
悉出勿留

六韜上賢可怒而不怒姦臣乃作可殺而不殺大賊乃
發

詆辭曰

隋經籍志梁周易妖占十三卷京房撰御覽咎徵部多
引京氏妖占

關動牡飛

地官司門注鍵爲牡御覽

一百八十四

何承天纂文曰牡出

鑰者也人作鑰字鑰母非也淮南說林盜跖見飴曰可以黏牡注牡門戶籥牡也此並謂出鑰者爲牡然此云關動牡飛則似爲管著關者牡本在人手不得隨之飛盜跖黏亦不以爲出鑰之匙也

永病三月有司奏請免

唐宋則假滿百日停官冊府

九百六

嚴綬爲檢校司徒兼

太子少傅穆宗長慶二年四月御史臺奏綬疾假滿百日合停勅嚴綬年位俱高須加優異仍依舊秩未博舉停按勳賢懿德固自上裁也

周召則不然

召公文王庶子故杜鄴云然

文侯寤犬鴈之獻

說苑奉使作晨鳧北犬韓詩外傳作北犬晨鴈此與注
作犬鴈者傳寫之誤

陰義殺也

繁露

陽尊陰卑篇

春秋之於昏禮達宋公而不達紀侯之母

達陽而不達陰以天道制人也

公羊隱二年傳紀履緌來逆女紀有母何以不

稱母母不通也

善閔子騫守禮不苟從親

此卻勝陳羣之說漢人師說如是

病卒

西京雜記杜子夏葬長安北四里墓前種松柏樹五株
至今茂盛

何武王嘉師丹傳

武兄弟五人

常璩先漢士女志武兄中郎將何霸字翁君武弟潁川
太守何顯

市嗇夫求商

唐六典注漢代諸郡國皆有市長隋氏始有市令按此

乃縣市但置嗇夫

爲廬江長史

爲曹史之長非與府丞對秩之長史也其後歲中得舉則是右曹掾史而舉孝廉也

樂辟雅拜

莊子田子方篇解衣般礴司馬彪謂箕坐也此謂槃跚行也辟礴聲同春官太祝奇拜杜子春云奇讀爲奇偶之奇謂屈一膝今雅拜是也

遷沛郡太守

御覽

六百三十九

風俗通曰沛郡有富家公資二千餘萬小

婦子年裁數歲頃失其母又無親近其大婦女甚不賢
公病困思念惡壻爭其財兒判不全因呼族人爲遺令
云悉以財屬女但以一劍與兒年十五以還付之其後
兒大姊不肯與劍男乃詣郡自言求劍時太守大司空
何武也得其辭因錄女及壻省其手書顧謂掾史曰女
性強梁壻復貪鄙其父畏賊害其兒又計小兒正得此
財不能自全護故且俾與女內實寄之耳不當以劍與
之乎夫劍者亦所以決斷也限年十五者智力足以自
活度此女壻必不復還其劍當聞縣官縣官或能證察
得以見伸展也凡庸何能思慮強遠如是哉悉奪取財

以與子曰弊女惡聲溫飽十五歲亦以幸矣于是論者
乃服謂武原情度事得其理

問文吏必於儒者

論衡程材篇論文吏儒生之優劣云刺繡之師能縫帷
裳納縷之工不能織錦儒生能爲文吏之事文吏不能
立儒生之學也

異姓大臣

秋官司儀注異姓婚姻也庶姓無親者也師古妄詆學
其於禮經懵不識丁乃云異姓謂凡庶之家千載笑端
戶殿門

小雅戶止也戶取其闔礙亦通爲扃按王嘉正爲戶郎也

南陵丞

王應麟曰漢無宣城郡南陵縣南陵屬京兆顏注不攷地理志也一統志南陵廢縣在西安府咸甯縣東南寰宇記在萬年縣東南二十四里白鹿原

有章劾事留中會赦壹解

如京兆尹張敞事是也續禮儀志立春之日下寬大書罪非誅死且勿按驗則漢制雖不逢赦入春令亦得寬也

章文必有敢告之字廼下

唐關訟律諸告人罪皆須明注年月指陳實事不得稱

疑違者答五十

但違一事卽答五十謂牒未入司卽得此罪

又云諸誣告人

者各反坐

都內錢四十萬萬

御覽

六百二十七

桓譚新論漢百姓賦斂一歲爲四十餘萬

萬吏俸用其半餘二十萬萬藏于都內爲禁錢少府所

領園地作務八十三萬萬以給宮室供養諸賞賜

引王渠灌圖池

水經注昆明故渠又東而北屈逕青門外出未央宮桂

宮之間謂之明渠明渠又東逕長樂宮北故渠又東出城分爲二渠卽漢書所謂王渠也一水逕楊橋下卽青門橋也北注謂今無水其一水右入昆明故渠一統志王渠在西安府城北

宗廟三宮

丁姬先卒此成帝母及傳太后趙皇后也顏劉說並誤臣謹封上詔書

漢舊儀詔書下朱鉤施行詔書有違法令施行之不便曹史白封還尙書對不便狀唐六典中書舍人職制勅旣行有誤則奏而改正之宋史職官志門下省給事中

掌讀中外出納若政令有失當除授非其人則論奏而

駁正之中書省舍人掌行命令爲制詞事有失當及除

授非其人則論奏封還詞頭

唐書表高傳高爲給事中德宗復用盧杞爲饒州刺

史詔出高執之不下仍上奏又于正殿奏遂追饒州制

李藩傳遷給侍中制敕有不可遂于黃敕後批之吏曰

宜別連白紙藩曰別以白紙是文狀豈曰批勅耶按此

則中書省以下而門下封駁者也又李藩與權德輿在

中書有密旨曰王鏐可兼宰相藩以筆塗兼相字卻奏

上云不可德輿失色曰縱不可宜別作奏豈可以筆塗

詔耶曰勢迫矣出今日便不可止事果寢此論執于宰

臣者也又呂元膺傳爲尚書左丞封還潘孟陽除散騎

常侍王遂鄧州刺史詔書清明示枉直則尚書省亦得

封上詔書也清波雜志唐制惟給事得封還詔書富鄭

公知制誥日封劉從愿妻遂國夫人公乃繳還詞頭後

人遂踵而行之中書舍人繳還詞頭自此始劉元城語

錄王安石薦李定擢監察御史襄行中書舍人宋次道

封還詞頭辭職次直呂大臨再封還之最後付蘇子容

又封還之更奏復下至于七八此中書行人駁詔也

故不敢自劾

唐職志律稽綬制書一日笞五十十日徒二年被制書有所施行而違者徒二年按漢有廢格詔書之罪本當自劾也

乘吏小車去蓋

隋書刑法志陳制階品死罪將決乘露車

追謚嘉爲忠侯

西京雜記何武葬北邙山薄龍坂王嘉冢東北一里

郎中令冷褒

劉敞曰是時無郎中令按荀悅紀無冷字則姓令名褒也

不宜漏泄

唐六典中書舍人職其禁有四一曰漏洩職制律漏泄大事應密者絞非大事應者徒一年半

厚丘之中鄉

厚丘縣屬東海郡

違俗則危殆

說苑敬慎篇孔子說詩至于正月之六章憊然曰不逢時之君子豈不殆哉從上依世則廢道違上離俗則危

身

楊雄傳

楊侯

禮記坊記淮南汜論有揚侯然非河東之楊也以儒者
自叙譜系猶致僞謬實所不解

處巴江州

江州今重慶府治

雄少而好學

常璩叙志林間字翁孺楊雄師古文苑雄答劉歆書云
蜀人有嚴君平臨邛林間翁孺者深好訓詁猶見輶軒

之使所奏言翁孺與雄外家牽連之親又君平過誤有
以私少而與雄也翁孺死雄以能草文先作縣邸銘王
俱頌階闕銘及成都城西隅銘

口吃

管子樞言行年六十而老吃

不得時則龍蛇

莊子山木篇一龍一蛇與時俱化

辟牢愁

楚語伍舉曰德義不行則邇者驤離而遠者距違注驤
愁也離辟也屈原列傳離騷者言離憂也解正同牢愁

雙聲

或鼻祖于汾隅

能改齋漫錄云方言獸之初生謂之鼻人之初生謂之首梁益謂鼻爲初注云鼻始也非

帶鉤矩

墨子辭過鑄金以爲鉤珠玉以爲佩繁露服制鉤之在前朱鳥之象也按鉤所以繁革帶謂鉤法矩之方應劭說非

質難

莊子天道篇螯萬物而不爲戾郭云變而相雜故曰螯

廣韻僅狹也在械字細與應劭音義同則暨又轉爲僅作贗者非

莢茄

釋草荷其莖茄茄非荷字明矣師古知張揖字詁而忘

卻爾雅

魏書江式傳式上表魏初博士清河張揖著埤廣雅古今字訓究諸埤廣綴拾遺漏增長字源

抑亦于文爲益者然其字詁方之許慎古今體用或得或失矣此類尋之則式言不謬師古極爲貪常嗜瑣偶亦間襲新奇而動輒暗謬也

棍申椒

廣韻棍木名此當爲擗管子小匡垂橐而入擗載而歸亦省爲𣎵旣醉箋云室家先以相擗致說文稱橐束也

集韻依此傳云棍束木也又
出棍字云束草也實爲煩冗

抨雄鵠以作媒兮

抨當爲佷抨擊也佷使也郭忠恕佩觿抨彈也非此文
義

客有薦雄文似相如者

答劉歆書云蜀人有楊莊者爲郎誦之於成帝成帝好
之以爲似相如

奏甘泉賦

御覽

五百八十七

桓子新論曰予少時見楊子雲麗文高論

不量年少猥欲逮及業作小賦用思太劇而立感動發

病子雲亦言成帝至甘泉詔使作賦爲之卒暴倦卧夢其五臟出地以手收之覺大少氣病一歲餘李善注甘泉賦引新論云雄作甘泉賦始成夢腸出收而內之明日遂卒此文有脫誤御覽他卷所引亦與文選注同吳誤者實削改齊漫錄亦疑之然未見不也又引七畧曰甘泉賦永始三年正月待詔臣雄上

漢書三年無幸甘泉之文疑七畧誤也愚按成帝紀永始四年正月元延二年正月四年正月俱有行幸甘泉事據此傳下云其三月將祭后土其十二月羽獵不別年頭則爲一年以內之事奏甘泉賦當在元延二年與

紀文方合

明嘉靖間吳人楊成嘉官四川作郫縣楊子雲祠堂記辨子雲未嘗仕莽亦引新論楊子

雲作甘泉賦夢腸出明日遂卒偶
據誤本遂謂雄不仕莽朝可乎

八神奔

夔魑之屬方捐而扶之不得以爲神名又分猖狂爲二
益非李善曰武帝紀用事八神文潁曰八方之神按廣
雅山神謂之禺江神謂之奇物神謂之鬼疑土神謂之
獫羊水神謂之罔象木神謂之畢方火神謂之游光金
神謂之清明

列新雉

本草綱目辛夷本經名新雉拾遺名木筆今本草作辛
矧傳寫之誤矣師古云一名辛矧正據誤本耳

菱苦

集韻菱荇瑞草也

據字林

按符瑞志無此草御覽

八百七十三

白虎通曰賓連闕達者樹名也其狀連類相承或菱苦之聲同歟唐本草作菱蘭冠宗爽本草作薄荷

亡鄂

按亡鄂不可通亡當爲不之誤不與跗同

壁馬犀

李善以爲璧飾是也以馬犀形之璧綴玉樹上

惟弼環

據孟康注惟字爲帷注中鼓亦當爲動文選注弼環風

吹帷帳之聲也說文弣弓彊兒玉篇弣彊禹萌切帷帳起

兒集韻弣弦弓聲或作彊

冠倫魁

劉敞謂下能字屬此句按文選正如劉讀

參麗之駕

按晉輿服志大駕有從官中道左右道並驅者此參駕也有但分左右道者此麗駕也

行遊介山

寰宇記介山在蒲州萬泉縣南一里通志在縣東十五里

登歷觀

一統志歷山在蒲州府永濟縣東南舊志東南三十里其東爲神嶺

建五旗

漢舊儀清道建五旗晉輿服志以五牛建旗車設五牛青赤在左黃在中白黑在右又云豎旗于牛背行則使人輿之牛之爲義蓋取其負重致而安穩也按晉志未明眞牛木牛宋書禮志則云木牛宋史儀衛志熙甯七年太常寺言五牛旗蓋古之五時副車也以木牛載旗用人輿之失其本制宜省去

顏倫奉御

韓詩外傳二 孔子曰美哉顏無父之御也至于顏淪而少衰矣至于顏夷而衰矣

萬騎屈橋

曲禮注橋井上擇棒此言馬驤首之狀

秦神下轡跣魂負沴

秦神卽怒特祠如蘇林說茸頭當爲旄頭也師古以跣魂合秦神非也水經注渭水上有渭橋舊有忖留神像此神嘗與魯班語班令其人出忖留曰我貌醜卿善圖物容我不能出班于是拱手與言曰出頭見我忖留乃

出首斑于是以脚畫地付留覺之使還沒水故置其像
于水惟背以上立水上按卽其事也服虔解沴字當爲
灞玉篇水流兒俗沴作灞因誤耳

爪華蹈衰

水經注河水右丘明國語云

薛綜西京賦注引古作語

華岳本一山

當河河水過而曲行河神巨靈手盪脚蹋開而爲兩今
掌足之跡仍存華嚴開山圖曰有巨靈胡者徧得坤元
之道能造山川出江河所謂巨靈最屨首冠靈山者也
說文爪亦夨也从反爪職想反不以爲掌字衰亦襄之訛
一統志雷首山在蒲州府永濟縣南四十五里一名襄

山

嗟文公而愍推兮

地理志汾陰縣有介山水經注介山卽汾水中其山特
立周七十里高十餘里晉太康地記及地道記等並言
介子推隱于是山實非也按介推所隱綿山也此正成
帝祀后土行幸所及元和志汾州介休縣介山在縣西
南二十里輿地廣記介休縣有綿上山今謂之介山
介休東南有介山亦曰橫嶺亦曰綿山有介子推祠按介休東去汾陰且
八九百里與成帝所遊之介山縣絕而雄賦乃云嗟文
公而愍推不亦舛乎

樂史云按介之推所隱乃綿山也文公封之因號其山爲介山杜預

日在西河介休晉太康
地記言在河東非也

灑沈蒿

漢碑隸書蓄爲蒿正漢之俗體不得云古災字

貶隆周

周語順時覲上韋昭云覲視釋詁覲相也郭謂相視也
割其三垂

垂表也墨子號令從磨所指望舉一垂入竟舉二垂狎
郭舉三垂是以表爲垂

聊因校獵賦以風

文選注七畧曰羽獵賦永始二年十二月上按帝紀當

在元延二年

虎路

服虔以爲竹虎落是也蓋編竹爲籬通典笮籬戰格亦如此

徽車輕武

左傳楊徽者公徒也與此徽同續志輕車古戰車洞朱輪輿不巾不蓋建矛戟幢麾轉輒弩箠大駕法駕出射聲校尉司馬吏士載以次屬車

蹶浮麋

麋澤獸也爾雅翼麋是陰獸情淫而游澤浮或淫之訛

遙噓乎紉中

廣雅噓劇函舌也詩傳云噓函也正義引通俗文云口上曰臄口下曰函注師古解文選以爲晉灼又衍內字窮允闕與

說文允淫淫行兒從人出口下闕與之與卽豫允豫義連言獸允豫者窮闕取之也

上長楊賦

戴震方言疏證曰行幸長楊宮從胡客大校獵紀爲元延二年冬傳因雄有長楊羽獵二賦遂以長楊大校獵繫之羽獵後別云明年若以明年爲元延三年則紀于

三年無其事若以明年爲元延二年則紀於元年無行
幸甘泉河東及羽獵事傳誤也文選注亦以班固爲誤
又引七畧曰長楊賦綏和元年上綏和在校獵後四歲
無容元延二年校獵綏和二年賦又疑七畧誤也愚按
羽獵長楊二賦均是二年冬事而傳叙次一在當年一
在明年蓋以上賦之先後爲次也羽獵賦序但言苑囿
之廣泰奢以風先聞有校獵之詔逆作賦在行幸長楊
之前及雄從幸長楊親覩博獸歸奏此賦在明年爾蓋
雄于每篇自叙作賦之由故須別起班但承其文耳非
有誤也又疑七畧篇當時文不當有失或雄自叙只據

奏御之日秘書典校則憑寫進之年故參差先後也

左太華而右褒斜

隋書禮志大業三年煬帝在榆林突厥啓民及西域東
胡君長並來朝貢帝欲夸以甲兵之盛乃命有司陳冬
狩之禮詔虞部量拔延山南北周二百里並立表記兵
部建旗於表所五里一旗分爲四十軍軍萬人騎五千
匹前一日諸將各帥其軍集旗下鳴鼓後至者斬詔四
十道並揚旗建節監獵布圍按此煬帝侈心猶未及漢
之廣袤數百里盡獵獲也

帥軍蹕陟

劉淵林吳都賦注陸闌也因山谷以遮獸也說文陸依山谷爲牛馬圈也蕭該漢書音義因山谷爲牛馬圈

儲胥

六韜軍用篇三軍拒守木螳螂劒及扶胥廣二丈一百二十具一名行馬周禮司戈盾及舍設藩盾鄭云盾可

以藩衛如今之扶蘇歟又尙書大傳太公曰愛人者兼

其屋上之鳥不愛人者及其胥餘鄭云里落之壁韓詩外傳

三同藝文類聚九十二引六韜作餘胥御覽九百二十引作餘胥事類賦作儲胥文選注韋昭

云儲胥藩落之類是也諸書雖文異而義同師古解腐

陋又木雍槍纍者卽以木爲拒馬槍耳通典兵五拒馬槍以木徑二尺

長短隨事十字鑿孔從橫安檢長一丈銳其端塞要路行營圍守皆用之師古謂

以木擁槍又非也册府元龜九百八十一唐長慶元年以大

理卿兼御史大夫劉元鼎充北蕃會盟使赴吐蕃時贊

普建牙帳于野以柵槍爲壘每十步攢長槊百枚而中

建大旆次第有三門相去百步門有甲士此其制也

麾城擗邑

麾當爲摩集韻攄擗同博雅擬也一曰手約物按蜀志

許慈傳時尋楚撻以相震攄則是恐惕之義也文選作

擗禮器注擗之言芟也管子揆度篇隨之以法則中內

擗民也與此擗義同玉篇擗投也又有擊字云取作擗也誤分爲兩字說文止作擊作擗

爲是

革鞞不穿

釋名鞞韋履深頭者之名也鞞襲也以其深襲覆足也

說文鞞小兒履也又別

唐雅鞞履鞞也蓋卽皮韠故釋名云深襲

履足鞞卽鞞之變文

碎輶輶

此言以輶輶攻車破匈奴之穹廬也六韜軍畧攻城圍

邑則有輶輶臨衝墨子

備城門

攻者輶輶軒車孫子謀攻

篇注輶輶四輪其下四輪從中推之至城下按明史朱

燮元所云呂公車也應劭以爲匈奴車謬

朱燮元傳永甯奢崇明反

擁物如舟高丈許長五十丈樓數重牛革蔽左右置板如平地上載羽旗中數百人各挾機弩毒矢旁翼兩雲樓曳以牛俯瞰城中燮元曰此呂公車也乃用巨木爲機關轉索發千鈞石擊之以大砲擊牛牛返走

燒爛蠶

齊民要術作乾酪法七月八月中作之日中炙酪酪上皮成掠取更炙之又掠肥盡無皮乃止得一斗許于鑊中炒少許時卽出于盤上曝浥浥時作圓大如梨許又曝使乾得經數年不壞以供遠行作粥作漿時細削著水中便有酪味又云煎乳以先成甜酪爲酵大率熟乳一井用酵半匙攪使勻調以羶絮之屬茹瓶令煖良久以單布蓋之明旦酪成按酵卽酪母與乾酪異物張晏

說誤爛常爲蠶言酪之甘如繇蜜也

方以智通雅以燠蠶爲瓢蠶鼎鼎之

類反譏張晏爲臆說不知晏說乃是實事非可假借者也

充鋌癢者

充字張似正爲鈇亦非也當作吮文選注服虔曰耆鬣傷者或矛攢內未出其瘡如含然此解吮鋌也又云或箭插其項未拔叢若鬣馬此解癢耆也枚乘七發薄耆之炙李善云薄切獸耆之肉而以爲炙也耆今人謂之耆頭按耆與鬣同集韻鬣馬頂鬣特牲饋食禮鬣古文爲耆

骹屬而還

呂覽行論宋公肉袒執犧委服告病

桔隔鳴球

又選章昭注桔櫟也古文隔爲擊按荀子樂論執柷拊
鼙鼙卽隔也以爲樂器馬鄭並云鼙櫟則鼙者櫟敵擊
者撞柷古今之樂皆然宋史樂志元豐二年詳定所言
鼙擊則柷敵球則玉磬搏拊所以節樂琴瑟所以詠詩
皆堂上樂也楊雄蓋從今文尙書師古後解尤謬

荀子禮論

縣一鐘尙拊之隔楊倞注引此賦作拊隔鳴球

歌投頌吹合雅

投亦合也鄉飲酒禮注春秋傳曰肆夏繁遏渠天子所

以享元侯文王大明縣兩君相見之樂然則諸侯相與
燕升歌大雅合小雅天子與次國小國之君燕亦如之
與大國之君燕升歌頌合大雅疏云合樂者堂上有歌
瑟堂下有笙磬合奏此詩故云眾聲並作按如上所說
天子大饗明堂則歌頌合作矣故鐘師職以鍾歌奏九
夏鄭云九夏皆詩篇名頌之族類又文王世子云登歌
清廟下管象武大武詩序維清奏象舞也正義云必知
下管象非此象者以象與清廟俱是文王之事不容一
升一下樂師疏云舞勺者卽周頌酌序云酌告成大武
也舞象者卽周頌序云維清奏象武也賈與孔異賈疏

是也且文王世子祭統等明言管象舞武象武並是一

時之事

武詩序所云奏大武祭統云舞莫重于武宿夜

何尙執管象爲大武乎

壹從壹衡

韓策奏王曰吾固患韓之難知一從一橫此其說何也士或自盛以橐

范睢傳無橐盛事秦策范睢說昭王云伍子胥橐載而出昭關雄言范睢扶服入橐者偶牽引及之

後陶塗

文選作椒塗應劭曰漁陽之北界師古謬說

東南一尉

御覽

二百四十一

臨江記曰漢元鼎五年立都尉府於侯官

以鎮撫二粵所謂東南一尉也

西北一侯

地理志中部都尉治敦煌步廣侯官續志張掖屬國有侯官城

徽以糾墨

釋詁徽止也易釋文坎上六徽纆劉云三股曰徽兩股曰墨皆索名

結以倚廬

廬謂學舍後書儒林傳序博士倚席不講卽明學士倚

卷之三十三 三十一 三十二 三十三

廬誦讀此非孝子所居門外東壁倚木爲廬者也詳文
義不當指行三年喪於禮既虞翦屏柱楣既練舍外寢
聖室亦不三年居倚廬也

或釋褐而傳

注云甯戚按管子閒呂覽舉皆無甯戚爲傳事小匡篇

田大司蓋甯越之訛也呂覽博志篇甯越學十五歲而周

威公師之

郡守不迎時

曹參禮梁石郡東郭先生于定國迎師受春秋故爲當

時所難

觀雷觀火爲盈爲實

易豐卦天地盈虛與時消息虞翻云五息成乾爲盈四消入坤爲虛李光地曰炎炎者火也隆隆者雷也當其炎炎隆隆以爲盈且實矣然豐卦雷居上則是天收其聲火居下則是地藏其熱此其盛不可久而滅且絕之徵也豐之義如此故卦爻俱發日中之戒至窮極則曰豐其屋蔀其家闕其戶闕其無人卽楊子雲所謂高明之家鬼瞰其室也楊子是變易象辭以成文

位極者宗危

周語高位實疾顛太玄上次八曰升于高危或斧之梯

響若砥隕

說文解氏字云巴蜀名山岸脅旁著欲落墮曰氏氏崩

聲聞數百里楊雄賦響若氏隕師古好杜撰而間用舊

說皆沒其本來是欲錮後生之聰明爲可恨也

氏承旨切又不

當爲丁

禮音郡國志漢陽隴縣有隴隄水經注引鄭注尙書

曰桓是隴阪名其道盤桓旋曲而上故名曰桓是

元和志泰

州清水縣小隴山一名隴坻又名分水嶺

應劭言天水隴坻亦可備一義

注本

訛龍

未知雄所言爲蜀爲隴也

潭思渾天

御覽

天部

桓譚新論曰楊子雲因厭儒之說天以爲蓋

常在旋日月星辰隨而東西乃圖畫形體行度參以四
時厯數昏明晝夜欲爲世人立紀律以垂法後嗣王蕃
渾天說曰舊說天地之體狀如鳥卵天包地外猶殼裏
黃也周廻如彈丸故曰渾天言其形體渾渾如也周天
三百六十五度五百八十九分度之百四十五東西南
北展轉周規半覆地上半在地下故二十八舍半見半
隱以儀准之其見常一百八十三度有奇是以知其半
覆地上半在地下也黃赤二道見於交錯一間相去二
十七度以兩儀准之俱三百六十五度強赤道見者常
百八十二度半強又南北考之天見者亦一百八十二

度半強是知天之體圓如彈丸北極出地三十六度是知南極入地亦三十六度而兩相去百八十二度半強

也

按如桓譚之論則子雲又嘗爲蓋天之術

參摹而四分之極于八十一

司馬溫公說玄曰最上曰方次曰州次曰部次曰家凡家每首輒變三首而復初如中周礪之類是也州三首一變九首而復初如中閑上之類是也部九首一變二十七首而復初如中羨從之類是也方二十七首一變八十二首而復初也如中更減之類是也八十一首以上不可復加故曰自然之道易有七八九六爲之四象

系有一二三謂之三摹

按立圖三方天地人也天地人各三州故九州也天地人各九

部故二
十七部

旁則三摹九据

玄告曰玄一摹而得乎天故謂之有天再摹而得乎地

故謂之有地三摹而得乎人故謂之有人

按此天地人爲三位

天三據而乃成故謂之始中終地三據而乃形故謂之下

中上人三據而乃著故謂之思禍福

按此天地人三變也

說玄圖

曰玄有二道一以三起一以三生以三起者方州部家

也以三生者三分陽氣以爲三重極爲九營是爲同本

離生天地之經也

立首四重者非卦也數也

說立易有六位系有四重易卦六爻爻皆有辭立首四重而別爲九贊以繫其下首舉贊分道而行不相因者也首猶卦贊猶爻

九九大運與天終始

說乎易卦氣起中孚除震離兌坎四正卦二十四爻主二十四氣外其餘六十卦每卦六日七分凡得三百六十五日四分日之一中孚初九冬至之初也頤上九大雪之末也周而復始系八十一首每首九贊凡七百二十九每二贊合爲一日一贊爲晝一贊爲夜凡三百六

十四日半益以踦贏二贊成三百六十五日四分日之
一句中初一句冬至之初踦贏二贊大雪之末亦周而
復始御覽三百八十五劉向別傳曰楊信字子烏雄弟
二子幼而聰慧雄竿立經不會子烏令作九數而
得之

二百四十三表

玄數云贊贏入表范望曰一五七爲一表三四八爲一
表二六九爲一表旦中夕各有小用故贊滿而入三表
按八十一首每首有三表以三乘之故二百四十三表
也

與泰初歷相應

太玄歷曰漢歷以八十一爲日法一歲三百六十五日
以日法乘之得二萬九千五百六十五分益以四分日
之一二十分少句合二萬九千五百八十五分少句以
二十四氣除之每氣得一千二百三十二分餘一十七
分少句以三十二乘分句八乘少句通分內子爲五百
五十二又除之得二十三秒每氣一千二百三十二分
二十三秒以三十二爲秒母每首得三百六十四分十
六秒每贊得四十分十六秒求氣所入贊法置冬至一
氣分秒以首分秒去之不滿首者以贊分秒去之餘若
千分秒算外命之得小寒所入首贊分秒求次氣置前

氣所餘分秒益以一氣分秒如前法求之

亦有顓頊之厯焉

御覽二劉氏厯正問曰說云顓頊造渾儀

揲之以三策

說平易大衍之數五十其用四十有九予天地之策各十有八合爲三十六策地則虛三用三十三策易揲之

以四玄揲之以三

太玄揲法挂一而中分其餘以三揲之并餘于芳一芳之後而數其餘七

爲一八爲

二九爲三

關之以休咎

玄數曰逢有上中下下思也中福也上禍也思福禍各

有下中上以晝夜別其休咎焉一從二從三從是謂大
休一從二從三違始中休終咎一從二違三違始休中
終咎一違二從三從始咎中終休一違二違三從始中
咎終休一違二違三違是謂大咎

緝之以象類

與五行之事具在玄數也又玄掇曰錯緝也

播之以人事

玄告曰善言天地者以人事善言人事者以天地

首衝錯測攤瑩數文掇圖告十一篇

說玄易有蒙玄有首易有序卦玄有衝

朱景文筆記蕭該音義衝作衝

云八十一家相對
易有雜卦玄有錯易有象玄有測所以

解易有繫辭立有攤注張瑩玄規日瑩明圖告易有

說卦立有數易有文言玄有文

翠虬絳螭之將登乎天

淮南覽冥訓今夫赤螭青蚪之游冀州也至于玄雪之

素朝陰陽交爭降扶風雜凍雨扶搖而登之

獫狁人亡

莊子徐無鬼作郢人育義引服虔說與此同鹽鐵論散

不足篇堊變壁飾別本亦說類篇犬部獫狁古之善塗暨

者卽據此按說文獫狁犬獫狁咳吠也詩正義陸璣疏獫

獼猴也說文作𦙇云貪獸也樂記𦙇雜子女鄭云𦙇或爲優玉篇引皋陶謨𦙇而毅 𦙇馴也說文作𦙇云牛柔謹也史記集解徐廣曰𦙇一作柔今按𦙇𦙇者通爲柔𦙇作𦙇𦙇者又形聲近而訛然此𦙇人無義疑本作郢爲鄭之誤鄭郢地連旣𦙇𦙇字易淆遂回換耳莊子釋文引此作優人可證

師曠之調鍾

見呂覽長見篇

號曰法言

論衡佚文篇楊子雲作法言蜀富人賁錢千萬願載于

書子雲不聽

諸子圖微

法言作圖徽吳秘曰徽美也辨其異端而謀其徽美

假言周于天地

溫公法言注假作遐師古以假爲至非也下云絕于邇言以邇對遐

初雄年四十餘來游京師

戴震方言疏證曰考王音薨于成帝永始二年丙午正月設雄至京師卽在前一年乙巳下至王莽天鳳五年戊寅凡三十四年時雄年三十八不得云年四十餘始

自蜀來至復甘泉泰時汾陰后土在永始三年十月四年始有行幸甘泉河東事則王音薨已三年傳序甘泉賦河東賦羽獵賦爲一年所作斷屬元延二年庚戌王音薨且五年不得云歲餘奏羽獵賦雄答劉歆書言楊莊而絕不及音則音薦雄殆出于傳聞失實

作訓纂

藝文志載訓纂而不及方言應劭序風俗通始言之西京

雜記楊子雲常懷鉛提槧從諸計吏訪殊方絕域四方之語以爲裨補輶軒所載亦弘意也常璩志

不言四賦而云典莫正于爾雅作方言應劭云凡九千字其發明猶未若爾雅之闕麗也亦以比爾雅則班序

脫之耳

盧文昭曰劉歆求方言入錄子雲不與故藝文志無之

爰清靜作符命

此指劇秦美新之文班不爲之諱而注不能舉

雄笑而不應

答劉歆書云張伯松

巧爲秦之張竦也

言恐雄爲太玄經由鼠

坻之與牛場也如其用則實五稼飽邦民否則爲牴糞

弃之於道矣而雄般之

章樵注般樂也

論衡齊世篇楊子雲作

太玄法言張伯松不肯一觀與之並肩故賤其言也

家素貧

御覽

五百五十五

桓子新論曰楊子雲爲郎居長安素貧比

歲亡其兩男哀痛之皆特歸葬于蜀以此困之

按法言云苗而

不秀者其我家之童烏乎九齡而與我
立文按烏爲第二子其一不可考也

侯芭爲起墳

論衡案書篇楊子雲作太玄侯鋪隨而宣之鋪芭文異

彼誤也文選注

五十九

七畧曰侯芭負土作墳號曰玄冢

長安志楊雄家牒曰詔陪葬安陵阪上

雄非聖人而作經

太玄集注陳漸曰按子雲法言解詡等止云太玄然則

非子雲自稱當時侯芭之徒尊之爲經耳按太玄法言

步步規隨易論語模擬剽竊顯然自追聖作諸儒之論

是也僭不在于有經字也至法言末篇乃云周公以來
未有漢公之懿也勤勞則過于阿衡其言殆爲穢藪

儒林傳

奸七十餘君

此出諸子雜說猶稱伊尹于湯七十說而不受公羊言
百二十國寶書並是蘭妄豈有實際史遷駁蹕班猶仍
舊非也

子張居陳

史記于上有子路居衛班以其先孔子死削之史記紕
繆如此

禽滑釐

據墨翟書禽滑釐爲彼弟子呂覽當染禽滑釐學于墨

子

尊師篇注禽滑釐墨子弟子

列子湯問楊朱篇莊子天下篇也

未可援墨入儒也

田子方吳起

呂覽重言篇注田子方學于子貢尊師篇段干木晉國之大駟也學于子夏史記吳起嘗學于曾子其年不相當經典序錄吳起受左氏傳于曾申非曾子

孔甲爲涉博士

孔叢獨治篇子魚名鮒甲陳人或謂之鮒或稱孔甲陳

餘謂陳王曰今必欲定天下取侯王者其道莫若師賢而友智孔子之孫今在魏居亂世能正行修業不爲時變必宗此人天下無敵陳王大悅遣使者齎千金加束帛以車三乘聘焉

積怨而發憤於陳王也

鹽鐵論文學曰陳王赫然爲天下首事道雖凶而儒墨或干之者以爲無王久矣道擁遏而不得行自孔子以至于茲而秦復重禁之故發憤于陳王也與此論同時遷書未行蓋古人言議並有師承也

諸弟子共定者咸爲選首

孔業答問博士將歿戒其弟子曰魯天下有仁義之國也戰國之世講誦不衰且先君之廟在焉吾觀叔孫通處濁世而清其身學儒術而知權變是今師也歸必事焉

孝文本好刑名之言

謂尹文公孫秉之言亦道家之支流故孝文好之

魯高堂生

索隱謝承書云秦氏季代有魯人高堂伯則伯其字

方聞之士

方旁古今字廣雅旁廣也史記作方正博聞之士

年十八以上

唐選舉志凡生年十四以上十九以下明選舉志洪武中每歲天下按察使選生員年二十以上厚重端秀者送監考留

得受業如弟子

唐六典四門學庶人子爲俊士生者與焉

按漢魏無貴賤之分至晉

咸甯四年立國子學于是貴胄入焉魏北齊隋並置四門助教

宋史選舉志初立四門

學自八品至庶人子弟充學生未幾學廢崇甯元年宰

臣謂天下州縣並置學縣學生選考升諸州學州學生

每三年貢太學至則附試

元符二年合州上舍附太學外舍試中補內舍生此明州

縣附學生 別立號考分三等入上等補上舍入中等補

下等上舍入下等補內舍餘居外舍五年初立八行科

和凡行鄉上之縣縣延入學審考無偽上其名于州明

志入國學者通謂之監舉人曰舉監生員曰貢監按元

舉志仁宗延祐間命下第舉人各授教官之職以慰其

歸不願仕者令備國子員明舉人入監始于永樂中會

試下第輒令翰林院錄其優者俾入學捐貲曰例監始

于景泰元年以邊事孔棘令天下納粟納馬者入監讀

書按此令州縣學生員入監限千人止行四年而罷憲

武長禮部右侍郎兼左春坊左庶子鄒幹等奏臨清縣

學生員伍銘等願納米八百石乞入監讀書今山東等

處正缺糧儲宜允其請從之并詔各布政司及直隸府

州縣學生員能出米八百石於臨清東昌徐州三處振

濟願入監讀書者聽此一時之弊政遂循之二百年

五月

令生員納米入監者
比前例減三百石

按其初猶令生員納粟馬至成化

中李寶等振濟始議令官員軍民子弟納粟送監讀書

則白丁爲監生矣雖爲禮官姚夔所駁而後乃公然行

之其上選事例與歲貢同

崇禎八年祭酒倪元璐言以
貢選爲正流援納爲間流

則汚學校而穢仕途自漢武立弟子員于學官而流弊

塵雜乃至此也可慨者已

引治五年王恕等奏停此生
員吏典上納事例曰前項納

漢書疏證卷三十三

三

各川

粟人等既以財進身豈能以廉律已欲他日不貪財害民何由而得十四年掌國子監禮部右侍郎謝鐸言納馬納粟入監者其賢百不一二而不肖者常千百今日之所輸行將取償于他日若此策再行則羹倫之堂竟爲交易之地必嚴塞其塗勿令再開嗚呼方正明白之臣孰不以此爲過舉哉

一歲皆輒課

通典魏黃初五年制五經課試之時募學者始詣太學爲門人蓋明儒士之類選舉志士子未入學者謂之童生當大比之年間收一二異敏三場並通者俾與諸主一體入場謂之充場儒滿二歲試通一經者稱士今之僧舞生亦其比也

弟子不通一經者罷遣唐六典國子太學四門博士課習諸生五分其經以爲之業習周禮儀禮禮記毛詩春秋左氏傳各六十人餘經亦兼習之習孝經論語限一

年業成尙書公羊穀梁各一年半周易毛詩周禮儀禮
各二年禮記左氏傳各三年其習經有暇者命習隸書
并國語說文字林三蒼爾雅每旬前一口則試其所習
業試讀者每千言內試一帖試講者每二千言內問義
一條總試三條通一及全不通者斟量決罰按宋
以後私試季考之法皆本此 每歲其生有能兩經以上求出仕者則

上于監堪秀才進士者亦如之

通典楊帝始建進士科
六典凡貢舉人有博識

高才強學待問無失俊選者爲秀
才明閑時務精熟一經者謂進士

唐選舉志館學每歲

仲冬舉其成者送之尙書省

舉選不由館學者謂之卿
貢皆懷牒自列于州縣試

已賓

遣考功員外郎試之凡明經先帖文然後口試經問

大義十條答時務策三道上上中上下中上四等爲

及第開元二十四年考功員外郎李昂為舉人詆訶帝

以員外郎望輕遂移貢舉於禮部以侍郎主之禮部侍郎親故

移試考功謂之別頭冊府元龜六百四十一太和七年八月制公卿士

族子弟明年已後不先入國學習業不應在明經進士

之限先是天寶十二載詔天下舉人不得充鄉貢皆須補國子學生及郡縣學生然後聽舉肅宗始復

宋史選舉志元豐中三舍法行太學置外舍生二千人

內舍生三百人上舍生百人始入學驗所隸州公據試

補外舍齋長踰月書其行藝于籍行謂率教不戾規矩藝謂治經程文通考

三舍月一公試季終考于學諭次學錄次正次博士後考

于長貳歲終會其高下書于籍以俟覆試參驗而序進

之凡私試孟月經義仲月論季月策凡公試初場經義

次場論策試上舍如省試法凡內舍行藝與所試之業

俱優爲上舍

通考上舍分三等俱優爲上一優一平爲中俱平若一優一否爲下上等命以官中

等免禮部試

崇甯三年詔取士悉由學校升貢其州郡

發解及試禮部並罷

歲試上舍悉差知舉如禮部試

宣和三年詔開封

府及諸路並以科舉取士

通考宣和三年賜進士第八百人

成爲使臣或小吏皆賜之弟先是大觀三年宣者梁師

成中甲科馬氏按太宗端拱二年有中書堂後及第上

奪所授敕牒勒歸本局詔今後吏人無得應舉著惟恐

雜流玷選舉也今閣官與其隸皆得以登甲科蓋至是

祖宗之良

法蕩然矣通考欽宗靖康元年正言崔鷗言自京賊用

事借學法以鉗士人如用軍法以脇卒伍大小相制內

外相轄一有異論則學官亦皆黜廢高宗紹興十三年

始建太學春秋兩補

宋史補弟子員試增至千員中選者皆給綾紙贊試以寵之

三

舍舊法凡四百十條紹興重修視元豐尤密

朝野雜記舊制太學

生積校已優而舍試又入優等者就化原堂釋褐號釋褐狀元授學官

元史選舉志私試

孟仲冬月辭理俱優者爲上等準一分

按此三舍舊法宋志咸淳八年

外舍生景泰亨以七分三釐乞理爲第三優朝命理優不許遂申嚴學法今後及八分者方許歲校三名

辭平者爲中等準半分每歲終通計其年積分至八分

以上者陞充高等生員歲終試貢

成宗大德八年始令國子蒙古色目漢人

三歲各貢一人十年定三年各貢二人武宗至大四年復立國子學試貢法蒙古授官六品色目漢人七品

文宗命所貢生員每大比選士與天下士同試于禮部

按如宋之免解明志六堂諸生有積分之法司業二員分爲左

右各調提三堂凡通四書未通者居正義崇志廣業一

年半以上文理條暢者升修道誠心又一年半經史兼

通文理俱優者乃升率性升至率性乃積分

孟月試本經義一道

仲月試論一道詔詰表內科一道季月試經史策一道判語二條其積分法一如元制積分八分者

爲及格與出身不及者仍坐堂肄業如有才學超異者

奏請上裁

卽有秀才異等

通典東晉元帝以天下喪亂務存慰勉遠方孝秀不復策試到卽除署旣經畧粗定乃詔試經有才不中舉者

免其太守

按文當有刺史

其後孝秀莫敢應命有送至京師皆

以疾辭太興三年尚書孔坦議請普延五歲許其講習

乃詔孝廉申至七年而秀才如故

漢魏秀才之制詳見百官志疏證

北

齊課試之法中書策秀才集書策貢士

按此當是上計吏

考功

郎中策廉良天子常服乘輿出坐于朝堂中楹秀孝各

以班草對字有脫誤者呼起立席後書有濫劣者飲墨

水一升文理孟浪者奪席脫容刀後周宣帝大成元年

詔州舉高才博學者爲秀才

北史杜正玄開皇中舉秀才試策高第時海內惟正

玄一人舉秀才餘常貢者隨例銓注訖正玄獨不得進

止曹司以策過揚素素怒曰周孔更生尙不得爲秀才
刺史何妄舉此人素志在試退正玄乃手題使疑司馬
相如上林賦王褒聖主得賢臣頌班固燕然山銘張載

劍閣銘白鸚鵡賦曰我不能爲君住宿可止未時令就正玄及時並了素大驚曰誠好秀才其弟正藏亦舉秀才正倫復舉秀才隋世天下舉秀才不十人而正玄一門三秀人名其所居爲秀才村按杜玄事與隋書異

大唐貞觀中秀才有舉而不第者坐其州長由是廢絕

開元二十四年以後復有此舉其時進士漸難而秀才本科無帖經及雜文之限反易于進士主司以其科廢久不欲收獎應者多落之三十年來無及第者至天寶初禮部侍郎章陟始奏請有堪此舉者令官長特薦其常年舉送選舉志唐永徽二年始停秀才科六典國子監置大成

者並停十人取貢舉及第人考功簡聰明者試書日誦得一言并口試策試所習業等十條通七然後補充仍授散官俸祿賜食會同直官例給大成通四經業成上于吏部試登第加一階放選每三年一試若九年無成則免大成從常調按明志太祖擇舉人趙惟一及年少貢生明之舉監同之

董景等入學讀書命于諸司先習吏事謂之厯事監生

取其中尤英敏者李擴等入文華武英堂說書謂之小秀才其才學優贍聰明俊偉使之博極羣書講明道德經濟以期大用謂之老秀才今俗人但以稱附學生矣輒罷之

唐選舉志在學九歲不堪貢者罷歸

按韓文公集太學生何蕃入太學者

二十餘年

其不帥教及歲中給假違程皆罷歸既罷條其狀

下之屬所五品以上子孫送兵部準蔭配色

歸崇敬傳為國子司

業議曰有不率教者擯楚之國子移禮部為太學生太學又不變徙之四門四門不變徙本州之學復不變縣役如初終身不齒雖率教九年學不成者亦歸之本州宋史志崇甯五年令州貢

士入辟雍外舍三經試不與升補兩經試不入等仍犯上

三等罰者

謂不率教戾
規矩之類

削籍再赴本州歲升試是名退

送大觀元年詔縣學生三不赴歲升試及三赴歲升試

而不能升州學者皆除其籍

凡縣學生隸學已及三月
不犯上二等罰聽次年試

補州學外舍是名
歲升皆蔡京所定

通考紹興十八年詔太學在籍外舍

生若入學已及五年不預校定及不曾請到國學解或

不曾公試入等自紹興十九年為始歲終檢校除籍日

知祿洪武二十四年七月庚子詔歲貢生員不中其廩

食五年者罰為吏不及五年者遣還讀書次年復不中

者雖未及五年亦罰為吏

明志太祖因諫官閔賢奏設
為定例府州縣學歲貢生員

各一人翰林考試經書義各一道判語一條中式者一
等入國子監二等送中都中遣還提調教官罰停廩

祿
正統元年五月壬辰始設提調學校官每省添按察
使一員南北御史各一員其條例曰生員食廩六年以
上不諳文理者罷黜爲民當差按漢世外郡國雖無考
校之法然其學不成及自太學罷歸者仍充正卒給繇
役可知

而請諸能稱者

史記作而請諸不稱者罷是也何焯曰是謂罷其受業
又請行不率教之罰若僅爲弟子則太常自擇二千石
令與偕計何奏請之有按史記所云當是兼坐舉主也
通考

四諸不稱者謂太宰之謬選博士之失教及郡國

之濫以充賦也功臣表山陽侯張當居坐爲太常擇博士弟子故不以實完爲城旦則其罰可知矣

遷留滯

上言高第爲郎中若中材僅通一藝爲掌故未有遷徙之階故下文設法變通若兒寬以掌故功次補廷尉文學卒史匡衡以掌故調補平原文學是也此條文義作通考者亦不能解蓋不知三輔有一百石史又誤以卒史爲佐史故也

張敞傳黃霸傳俱可考證

以補中二千石屬

掾也史也屬也自爲三等蘇林云屬亦曹史非也

詳百官志

宣帝末增倍之

并增博士秩六百石

續志本四百石

員十二人

請置功令

史記索隱功令卽今學令也按唐會要太和五年十二月祭酒裴通奏按學令云諸生先讀經文通熟然後試文講義其試讀每千言內試一帖帖三言講議者每二千言內問大義一條總試三條通二爲及第此唐之學令大畧師古引選舉令亦見六典學令又選舉令中一門也

能通一經者皆復

宋志凡州縣學生曾經公私試者復其身內舍免戶役

上舍仍免借借

字詭未詳

如官戶法元志至元六年中書省

定學制命民間子弟上路三十人下路二十五人願充

生徒者與免一身雜役元貞元年命有司割地給諸路

蒙古學生員餼廩

成宗大德十年增生員廩膳通前三十員爲六十員按此廩膳生之名也

日知錄明初諸生無不廩食于學會典言洪武初令在

京府學六十人在外府學四十人州學三十人縣學二

十人日給廩膳

明志月廩食米人六斗有司給以魚肉

聽于民間居住免

其差徭二丁其後以多才之地許令增廣亦不過三人

五人而已踵而漸多於是宣德元年定爲之額如廩生

之數其後又有軍民子弟待補增廣之名正統十二年

乃號曰附學生

按宋元於太學則有之孝宗令諸路州軍以解試終場人數爲準其薦貢始盡

者令百取六人赴太學謂之待補生元仁宗延祐二年秋八月增置國子學生員百人陪堂生二十人見本志

考漢志郡國亦有學官弟子續志學士爲民法式者扁

表其門此則諸生祭酒也其少者東漢曰門下議生蜀郡

守文翁修起學宮于成都市中招下縣子弟以爲學官弟子爲除更繇每出行縣使傳教令縣邑吏民見而榮之爭欲爲學官弟子至北魏獻文帝初立定額大郡學富人至出錢以求之

生百人次郡學生八十人中郡生六十人小郡學生四

十人唐因而增損之

通考國子監所管學生尙書省補州縣學生州縣長官補明設提學

道專董之非責成牧守法

郡國置五經百石卒史

此鄉學教官之始通考

四十

後魏獻文帝天安初大郡

立博士二人助教四人中郡博士一人助教二人下郡

博士一人助教一人唐六典京兆等府及都督諸州並

置經學博士一人助教二人

並州選

京兆河南諸縣令置

博士一人助教一人宋志慶厯四年詔州縣皆立學本

道使者選部屬官爲教授員不足則取于鄉里之有道

業者熙甯初命諸州置學官率給田十頃贍士初置小

學教授

通考熙甯四年以陸佃等爲諸州學官仍令中書采訪逐路有經術行誼者雖未仕亦給簿尉

俸使權教授他路州軍命近日選薦京朝官有學行堪爲人師者堂除逐路官令兼所任州教授仍置小學教

授元符二年初令諸州行三舍法考選升補諸路選監

司一員提舉學校

提學道之始

崇甯元年州置教授二員縣

亦置小學

蓋自此通海內皆置教授通考熙甯八年詔諸州學官先赴學士院試大義五道取優通

者選差元豐元年詔諸路州府學官共五十三員蓋重師儒之官不肯輕授濫設故也其所用者既是有出身人又必試中而後授則與入館閣翰苑者同科其遴選至矣三舍法行而員額愈多宣和三年詔

罷州縣學三舍法州學官元豐舊制所有者如故其餘

並罷元志世祖中統二年始命置諸路學校官二十八

年令江南諸路學及各縣學內設立小學

按此義學之始選老

成之士教之其他先儒名賢之所與好事之家出錢粟

贍學者並立爲書院

通考宋太宗太平興國二年賜廬山白鹿洞九經又賜石鼓書院勅

額唐元和間衡州李寬所建真宗大中祥符二年應天府民曹誠造舍百五十間聚書數十卷博延生徒講習甚盛詔賜額應天府書院入年賜潭州嶽麓書院始開寶中郡守朱洞首度基創字以待四方學者山長周式以行義著八年召見便殿拜國子監學主簿使歸教授詔賜書院名宋興天下四書院之本末如按此則元做宋制凡師儒之命于朝廷者曰教授路府上中州置爲之

之命于禮部及行省及宣慰司者曰學正山長學錄教

諭路州縣及書院置之

受行省及宣慰司劄付

泰定元年令兩舉

不第者與教授及學正山長順帝時下第者

元文作已廢復興之

後蓋言順帝曾罷科舉也史文暗謎不可訓

悉授以路府學正及書院山長

又增取鄉試備榜

按此副榜之始

亦授以郡學錄及縣教諭明

志太祖擇國子生壯歲能文者爲教諭等官永樂時會

試有副榜大抵署教官成化十三年御史胡璘言天下教官率多歲貢言行文章不足爲人師範請多取舉人選用而罷貢生勿選部議歲貢如其舊而舉人教官仍許會試自後舉人就教者亦漸多矣

增弟子員三千人

後書黨錮傳太學諸生三萬餘人郭林宗賈偉節爲之冠按若是之多是皆垂綬曳裾而浮遊往來以太學爲傳舍耳通考晉武帝初太學生三千人太始八年有司奏太學生七千餘人才任四品聽留詔曰已試經者留之大臣子弟堪受教者令入學其餘遣還郡國孝武太元初于中堂立行太學時無復國子生置太學生六十人國子生權銓大臣子孫六十人事訖罷隨文帝仁壽元年詔

以天下學校生徒多而不精惟簡留國子
學生七十人太學四門及州縣學並廢唐書儒林傳

太宗於國學增築學舍一千二百間國學四門博士亦
增置生員其書算合置博士學生以備藝文凡三千二
百六十員其玄武門屯營飛騎亦給博士授以經業有
能通經者聽之貢舉高麗吐蕃等諸酋長亦遣子弟請
入于國學之內鼓篋而升講筵者八十餘人宋史志崇
甯中蔡京奏今貢士盛集欲增太學上舍至三百人內
舍六百人外舍三千外學號爲辟雍在城南門外爲四講堂百齋
齋列五楹一齋可容三十人光宗紹熙三年禮部侍郎
倪思請復混補法吏部尙書趙汝愚等奏曰國家恢儒

右文京師郡縣皆有學然奔競之風勝而忠信之俗微
亦惟榮辱升沈不由學校德行道藝悉取糊名工雕琢
之文無進修之志視庠序如傳舍目師儒如路人季考
月書盡成文具請重教官之選假守貳之權倣舍法以
育材因大比以取士考終場之數定所貢之員期以次
年試于太學其諸州課試升貢之法下有司條上思議
遂寢明志歲貢之始必考學行端莊文理優長者以充
之不中者遣還
停廩見前其後但取食廩年深者弘治中南京祭
酒章懋言洪永間國子生以數千計今在監科貢共止
六百餘人歲貢挨次而升衰遲不振者十常八九舉人

生監又每後時差撥不敷教養罕效近年有增貢之舉而所拔亦挨次之人資格所拘英才多滯乞於常貢外令提學行選貢之法不分廩膳增廣生員通行考選務求學行兼優年富力强者乃以充貢通計天下之廣約取五六百人以後三五年一行則人才可漸及往年矣乃下部議行之此選貢所由始也今著令以嘉靖中南北國學皆空虛議盡發下第舉人入監且立限期以趣之然舉人不願入監者卒不可力强二十七年祭酒程文德請將廷試歲貢惟留卽選者於部而其餘盡使入監歲貢諸生合疏言家貧親老不願入監禮部復請從其所願元士之子得受業如弟子

宋志崇甯制外官子弟親戚許入學一年給牒至太學
用國子生額解試孝宗朝清要官許牒期親子弟作待
補國子別號考校甯宗以國子生員多僞濫命行在職
事期親釐務官子孫乃得試補明志品官子弟曰廕監
初因前代任子之制文官一品至七品皆得廕一子以
世其祿高者補中書舍人嘉隆以後宰相後乃漸爲限
子有初授卽爲尙寶司丞轉少卿制在京三品以上方得請廕謂之官生出自特恩不限
官品謂之恩生或卽與職事或送監讀書

漢書疏證卷三十三

漢書疏證卷三十三 率

浙江書局刊

吳超校

丁立誠校

王家賢校